

ME KOLOSE 'IDI LETA PAULO 'I'ETOLADINA

Toe'ita kabokabo me Kolose siguguyedi, sigwae, “Yesu Keliso nige ya sawesawenaya 'i'etoseyeda 'ida to'umalinao maibo'adi 'ediyega. Tauna 'ina waiwai tupwana namo, ta 'ilobweneda be 'aina 'ebe emisao wate tamuliyedi.” 'Enega me Kolose 'idi leta gete solanaya Paulo loguguya palupaludi 'i'ebwa'edi, 'igwae, “Yesu Yaubada Natuna, Toewaiwai sana, tebweuna tauna yage maibo'ana sawesawenaya.”

Lokagutoki

1 ¹ 'Abo'agu Yaubada 'ina esinuwe ga yaetoguinuwa Yesu Keliso manuna, ta tasidai Timoti 'ilemegu ga 'imi leta gete ya'eto'etoladinawa, ² me Kolose, 'omi Yaubada 'ina bodao, ta Keliso 'ana toemisao, 'emiya. Tamada Yaubada 'ina oboboma 'enega wada miyabobo'ana.

Paulo me Kolose manudi 'ilokagutoki

³ “Tuta yauyauna 'ima sidasida Yaubada, tauna 'ida 'Inapwana Yesu Keliso Tamana, 'enaya, 'anuwa'i'isimi ta manumi 'alokagutoki, ⁴ ^b manuna tetelimi 'anononaya, 'aene Yesu Keliso waemisena, ta toekalesiyao yauyaudi waobobomedi, ⁵ manuna wanuwanuwayaina 'aene 'imi 'ebe gwausowala ma'etamo galewaya waloba, nadigega lowa tetela bobo'ai'ailina wanonona.

⁶ Tetela nina wanononaya sena yauyaudi 'ediya, gete tuga 'isinasinabwa ta 'iuwauwa, nadigega 'omi tuta nina Yaubada 'ina oboboma wagimi nononaya Epapila 'enega, ga wa'awa 'ai'ailena. ⁷ Ona'ai'aila, goselai Epapila nina tai bobo'ana, ga tetela nina 'igimi e'itemi. Manuna 'ilopa'eluma 'abo'ama, ga 'ietaetapewa Keliso manuna 'emiya, ⁸ ta 'enega Epapila nina Yaluyaluwa Tabuna 'ana oboboma 'atemiya ni'atu 'isimanena 'emaya.

^a 1:3 Ep 6:18 ^b 1:4-6 Ep 1:13, 15; 1 Pi 1:3-4

Keliso 'ina guinuwa

⁹Tuta nina tetelimi 'agimi nonona ga 'ana laba batuwa, nigeaya 'ima sidasida manumi 'ada losa'u, ta esi Yaubada 'ena 'a'awa'awanoi be 'aene Yaluyaluwa Tabuna 'ida gienuwa sabwalenimi, be 'enega wada mwalatoi 'ai'aila to'ase 'ina nuwena manumi, ¹⁰^cbe 'imi guinuwa nidi 'ediyega 'ida 'Inapwana wada giegwausowali, be wate 'imi bubuna bobo'ana 'iuuwa, be Yaubada 'ana mwalatoi 'emiya 'ida sinabwa.

¹¹Ta wate tauna 'ina waiwai sinabwana 'enega 'ida giewaiwaiyemi, be 'imi guinuwa yaulyaudi 'ediya wae'alama'i'ita, be wada toolopa'ala, be wate ma imi gwausowala ¹²^dwada lokagutoki Tamada 'ena, manuna tauna 'ina tagwalega sena maemaedanina 'ena tamiyami, 'ina tomotaiyao ma'edao. ¹³^eOna'ai'aila, sena guguyoi 'enega 'i'etoseyeda, ga 'isa'u gelaseda Natuna bobo'ana 'ina 'ebeloina 'enaya, ¹⁴^fmanuna tauna 'ena 'etoseyana talobena, nate 'ida loegesiya 'ediyega 'igie'esaseda.

¹⁵^gAbo'ada nigeaya sawesawenaya Yaubada ta'ita, ta esi 'ana 'ita tuga Natunana nadigega, ta Yaubada 'ina mweluluwa maibo'adi Natunana 'iloetana sinedi, ¹⁶^hmanuna tauna yage maibo'adi galewaya be bale'uya 'aledi, yage nidi ta'ita'itadi, be yage nidi nigeaya tada 'itedi, nai taudi aniloseyao nai toloinao waiwai nai yaluyaluwao, maibo'adi Yaubada 'imweluluidi Natuna 'ina guinuweya, ta Natunana manuna. ¹⁷ⁱTa lowaenei muliyega be mwelumweluluwao siapwesa, Natuna nugana 'imiyami, ta tauna 'ina waiwaiyega yage maibo'adi simiya'ai'aila ta sipaipaisewa.

¹⁸^jAbo'ada toekalesiyao 'atuwa welawela'anao, ta tauna debada, ta tauna 'ebe e'ale, ta mwawasega tauna togimitoolo limana, be 'enega yage maibo'adi 'iloetana sinedi. ¹⁹^kTa Yaubada nuwanuwana, ga tauna 'ina waiwai be 'ina bubuna maibo'adi 'ediyega Yesu 'iloemaena, ²⁰^lga Yesu nina kelose 'ena lalana 'ina dauyega yage maibo'adi bale'uya ta galewaya simiya dumduma ni'atu 'ime'edi Yaubada 'enaya sabi egosigosiyana limana.

²¹^mOmi wate lowa wamiya 'edasola ta 'imi nuwanuwa 'enega Yaubada waetalauwalena, ga wabubuna to'umalina, ²²ⁿta Yesu oona 'ina mwawasa 'enega 'i'au'ewemi ga Yaubada ma'emi waegosigosiyana limana, ma imi bubuna bobo'ana ta 'esasena matanaya, ²³^onate 'eguma 'imi emisa geya'abo 'ineeneta, be 'eguma watoolo pa'ala tetela bobo'ana nina wanononaya 'ana emisa 'ena, ta nigeaya wapilipilisine. Tetela nina 'ana loguguya tomota maibo'adi bale'uya sinononaya, ta 'abo'agu Paulo 'ana tologuguya 'ebweu.

^c 1:10 Pi 1:27; Ep 2:10 ^d 1:12 Ep 1:18-19 ^e 1:13 Ep 6:12 ^f 1:14 Ep 1:7-8 ^g 1:15 Yo 1:18

^h 1:16 Yo 1:3 ⁱ 1:17 Yo 1:1 ^j 1:18 Ep 1:22-23 ^k 1:19 Kol 2:9 ^l 1:20 Ep 2:16

^m 1:21 Ep 2:3 ⁿ 1:22 Ep 2:14-16 ^o 1:23 Ib 6:11

Paulo 'ina paisewa toekalesiyao manudi

²⁴'Enega gete tuga 'igu 'elouya 'omi manumi yalobalobadi, ta tuwa tuga ma igu gwausowala. Taugu bwalagu 'ina 'elouya be Keliso 'ina 'elouya 'iloeposeyanena ga 'isinabwa toekalesiyao manudi, nate taudi Keliso oona.

²⁵Ta toekalesiyao 'omi manumi 'abo'agu wate Yaubada 'ina loinega yaetoanugana, be 'aene Yaubada 'ina ona yasimana apwese, ²⁶^Pona nina lowa gimi tomota ta tubudao 'ediyega 'ikwaiyena, ga gete tuga 'iloapwesena 'ina tomotaiyao 'abo'ada 'eday. ²⁷^QMwalatoi gete lowa kwaikwaiyina, ta 'ibobo'ana wawasae, Yaubada nuwanuwana be 'iloapwese 'omi nigea me Yudia 'emiya. Mwalatoi nina nate Keliso 'atemiya 'imiyami, be tauna 'enega wada nuwayaina 'aene sena esaesa 'ena walulugu. ²⁸^RTauna Keliso nina 'asimasimane, ta 'ima mwalatoi 'ai'ailega 'aloguguya ta 'ae'ie'ita tomota maibo'ami 'emiya, be 'aene Keliso 'ana toemisao 'omi 'ada gieapwesemi ma imi bubuna maibo'ana bobo'ana, ta matuwana. ²⁹^SGete manuna 'abo'agu yaetaetapewa, ta yaewaiwai, tauna 'ina waiwai 'ateguya 'i'ebwa'eguya 'enega.

2 ¹Nuwanuwagu be wada nuwasabwalena 'aene 'abo'agu yaetaetapewa sinabwana 'omi manumi, be me Laodisia manudi, be wate taudi 'etamo maninigu nigea si'ita'ita manudi, ²^Tbe 'aene taudi wate obobomega sida egosigosiyana 'ai'aila, ma 'adi lotoona bobo'ana, be ma idi mwalatoi 'ai'aila, 'enega sida gwausowala sinabwana, manuna ni'atu sinuwanuwa sabwalena mwalatoi lowa kwaikwaiyina manuna, nate Keliso. ³^UTa Keliso nina 'ena sinasinapu be mwalatoi maibo'adi simiyami, nate 'ida esaesa sinabwana.

⁴^VGete yaonaona be 'enega geya'abo mali tomota 'idi ona dibidibiyega sikabokaboemi. ⁵Gete tuga tomotenigu 'imiya 'edasola 'emiyega, ta 'igu nuwanuwa 'emiya 'imiyami, ga yagwaugwausowala 'imi miya bobo'ana be 'imi emisa pa'alina Keliso 'ena manuna.

Keliso ma'edai

⁶Ni'atu 'ida 'Inapwana Yesu Keliso 'ena wa'atetagwala, 'enega 'ilobwenemi be tauna 'ina waiwaiyega wada tautauya, ⁷^Wmanuna Keliso nina 'imi emisa 'alena, ta 'ana togiesinabwa, ta wate 'ana togiepa'ala, nadigega 'ae'ita'esemi, ga manuna walokagutoki sinabwana.

⁸Geya'abo 'ebweu yaita 'ikabokaboemi tomota 'idi sinasinapu 'enega, manuna mwalatoi nidi yage besobeso bale'uyega, ta nigea Keliso 'enega. ⁹^XManuna Keliso namo 'enaya Yaubada 'ina waiwai ta 'ina

^P 1:26 Ep 3:3-6 ^Q 1:27 Ep 1:18-19 ^R 1:28 Ep 4:13 ^S 1:29 1 Ko 15:10 ^T 2:2 Ep 3:3-4, 16-19 ^U 2:3 1 Ko 1:30 ^V 2:4 Lo 16:18 ^W 2:7 Ep 3:16-18 ^X 2:9 Yo 1:14, 16

bubuna maibo'ana simiyami. ¹⁰ʔTa Keliso 'enega bobo'ana 'ai'aila ni'atu walobena, tauna aniloseyao be yaluyaluwa bi'i maibo'adi 'iewaiwai sinedi ta 'iloina sinedi.

¹¹ʔTa wate Keliso 'enega 'ami we'iwe'iyaya walobena, 'atuwa nadigega lodaba^a, nigea lodaba oomi 'enaya, ta esi bubuna bale'u 'atemiyege 'idaba yaulena. ¹²^bʔEnega wate Keliso ma'emiya bapitaiso walobena, 'atuwa sisa'u 'ali'aliyemi, ta wate Keliso ma'emiya 'imi bapitaisoega watoolo limana, manuna Yaubada 'ina waiwai waemisena 'aene Keliso mwawasega 'igietoolo limena.

¹³^cʔOmi lowa lodaba nigea walobaloba, ta 'imi loegesiyao manudi 'atuwa mwawamwawasimi, ta esi Keliso ma'edai yawasi bobo'ana Yaubada 'i'ebwa'eda, ga 'ida loegesiyao 'inuwataudi, ¹⁴^dta 'ida lowaga 'ana lina mwauna 'i'upwa yaulena, ga 'ana kelose 'ena 'itutu epa'iyena. ¹⁵^eʔTa wate welabanao be yaluyaluwa bi'iyao maibo'adi 'igie mwa'utedi, ga 'ana keloseyega 'adi omayamaya 'isa'una, ta 'iewaiwai sinedi.

¹⁶^fʔEnega geya'abo 'ebweu yaita 'ilo'alo'aegilemi 'ami masula be 'ami bwasi manudi, 'eguma 'omi taudi 'idi 'emasula nigea waguiguinuwed, nai nawalae auwauna 'ina tutaya, nai sabate 'ediya. ¹⁷^gʔYage getedi 'ebe'ita tuga, ta 'adi mwalatoi 'ai'aila Keliso tauna 'igieapwesedi.

¹⁸^hʔEnega geya'abo 'ebweu yaita 'ida 'awa'awa to'umaliyemi manuna 'omi nigea watapwatapwalolo ma imi nuwamwa'uta aniloseyao 'ediya, manuna tomota nidi 'idi mwalatoi madawalega manudi sigagasa, ta sinuwatu'e bubuna bale'u 'ediyega, ¹⁹ⁱta esi Keliso nigea sigiyagiyai, tauna debada, ta 'abo'ada welawela'anao oo 'ebweuna 'ena, ga welawela'anao 'ebweuna 'ebweuna siguiguinuwa oo 'ebweuna 'ina bobo'ana manuna, be oo nina 'isinasinabwa, ta 'ana sinabwa nina Yaubada 'ina guinuwega.

Yawasida auwauna Keliso 'enega

²⁰^jʔLowa wamwawasa Keliso ma'emiya 'enega bubuna bale'u 'ina lina 'emiya ni'atu 'ilosa'u, ta to'ase manuna 'etamo waguiguinuwa 'atuwa me bale'u 'idi guinuwa nadigega? ²¹ʔTo'ase manuna tomota 'idi e'itao be loinao waematamatanedi 'aene, “Geya'abo masula gete wagitogitoo, nai walotolotoo?” ²²^kʔTa yage getedi sawasawalidi be 'abo taepaisewadi sigugumwala. ²³ʔOna'ai'aila, lina nidi 'adi 'ita 'atuwa sinasinapu 'ai'aila, manuna 'adi tomuliyao 'idi tapwalolo 'ena sietatapewa ma idi

^y 2:10 Ep 1:21-22 ^z 2:11 Lo 2:28-29 ^a 2:11 *daba nai lodaba*: Nugana 17:10-14 'ena Yaubada Ebelaamo 'iloinena be 'aene tauna be natunao me'olotodi be tubunao me'olotodi 'idi yage bwaladi sida 'upwa yauledi, nate we'iwe'iyaya nai 'ebe 'inana sida guinuwe, ta 'ana mwalatoi taudi Yaubada 'ina tomotaiyao esiesinuwadi. ^b 2:12 Lo 6:4-5
^c 2:13 Ep 2:1, 4-5 ^d 2:14 Ep 2:14-16 ^e 2:15 Kol 1:13 ^f 2:16 Lo 14:1-12 ^g 2:17 Ib 10:1
^h 2:18 1 Ko 4:6 ⁱ 2:19 Ep 4:15-16 ^j 2:20-21 Ga 4:3-5, 9 ^k 2:22 1 Ko 6:13

nuwamwa'uta, ta wate bwaladi siliuliunedi, ta tuga nigea 'ebweu wate 'idi waiwaimo, ta esi bwaladi 'idi yalakwaiya 'iloiiloinedi.

3 ¹Manuna Keliso ma'emi ni'atu watoolo limana, 'ilobwenemi be galewa yagenao wa'ebesedi, manuna Keliso nina Yaubada 'atainaya galewaya 'imiyamiya. ²Wate 'imi nuwanuwao wada sa'udi yage galewa 'ediya ta geya'abo yage bale'u 'ediya, ³manuna ni'atu wamwawasa, ta gete tuga yawasimi Keliso ma'iyana Yaubada 'enaya. ⁴Manuna yawasida bobo'ana Keliso nina 'enega ta'ewena, 'enega tuta nina 'abo Keliso 'iapwesama, 'omi wate Keliso ma'emiya waapwesa 'ina esaesa tuyatuyayalina 'enaya.

⁵Enega bale'u bubuninao 'emiya wada loemwawasidi, nate loelata be guinuwa baibailidi be yalakwaiyao be eesaesa, nate mali 'ebe emisa 'adi bwagobwago. ⁶Ta yage getedi manudi ma'etamo Yaubada 'igamwasowaleda. ⁷Ona'ai'aila, bubuna to'umalidi getedi lowa waguinuwedi. ⁸Ta esi gete tuga 'ilobwenena be waguitoyasedi, nate saiya be gamwasowala be e'ipi'ipi be sinala be 'awato'umali be ⁹wate geya'abo waekabokabo gosemiyao 'ediya, manuna bubuna bale'u ni'atu waguitoyasena, ¹⁰ta bubuna auwauna walobena, manuna Tomweluluwa nina tuta maibo'ana 'igiegie auwaumi, be 'aene tauna wada mwalamwalatoni be 'ina bubuna wada etotowane.

¹¹Enega nigea 'ebweu wate weyala 'imiyami be wada gwae, "Me Yudia mali boda ta 'abo'ama mali boda", nai wagwae, "Taudi bwaladi sidabedi mali boda, ta taudi nigea, mali boda", nai "Owagao be to'u'umalao mali bodao", nai "Ali'eiyao mali boda be 'inapwanao mali boda", ta tuwa tuga Keliso 'ina boda maibo'ada, ga 'atedaya Keliso namo 'iloegogoneda.

¹²Ta 'omi Yaubada 'ina obobomega 'iesinuwemi tauna manuna, 'enega 'ilobwenemi be wa'atenuwa 'ole'ole, be waeobooboboma, be wanuwamwa'uta ma imi 'atetagwala ta ma imi e'alama'i'ita, ¹³ta wada elemalema 'ebweuna 'ebweuna 'enaya, ta geya'abo wate gosemiyao walo'alo'aegiledi, ta esi 'idi to'umalinao wada nuwataudi, manuna 'ida 'Inapwana tauna wate 'imi loegesiyao 'inuwataudi. ¹⁴Ta sa'i 'ilobwenemi be adelimi wada eobooboboma, manuna oboboma 'enega guinuwa maibo'adi sipalupalu. ¹⁵Be wate Keliso 'ina nuwasiwalowa 'atemi 'ida loinedi. Gete manuna Yaubada maibo'ada 'ibwauyeda ga taeboda 'ebweuna, be manuna tada lokagutoki Yaubada 'ena. ¹⁶Wate Keliso 'ina ona bobo'ai'ailidi 'atemiya sida tabwa bobo'ana, be 'enega 'ebweuna 'ebweuna 'enaya wada e'ie'ita be wada loguloguguya mwalatoi

¹ 3:1 Mk 16:19 ^m 3:2 Md 6:33 ⁿ 3:3 2 Ko 5:17; Lo 6:6-7 ^o 3:4 1 Yo 3:2 ^p 3:5 Ep 5:3-5

^q 3:6 Lo 1:18 ^r 3:8-10 Ep 4:25-32; Lo 12:2 ^s 3:12 Ga 5:22-23 ^t 3:13 Md 6:14

^u 3:14 Lo 13:8-10 ^v 3:15 Yo 14:27 ^w 3:16 Ep 5:19

'ai'aila 'enega, be 'imi wali be Same walinao 'ediyega, be edale walinao Yaluyaluwa Tabuna 'enega 'ediyega, ma imi lokagutoki Yaubada 'ena 'atemiya.

^{17x}Ta 'imi guinuwa maibo'adi, nate 'imi onao nai 'imi paisewao, maibo'ana 'ida 'Inapwana Yesu 'ana esanega wada guinuwa, ma imi lokagutoki Yesu 'ana esanega, Tamada Yaubada 'enaya.

Mali boda be mali boda 'adi laina

^{18y}Ida 'Inapwana 'ina tomotaiyao 'abo'ada 'ada lobwene 'aene iine aiai nimi mwanemiyao 'idi onao wada ematamatedi. ^{19z}Wate nadigega 'omi me'olotomi mwanemiyao waobobomedi be geya'abo wa'ena'ena pa'alidi. ^{20a}Gogama 'omi wate tuta yauyauna tamamiyao be sinamiyao 'enadi wada ematamatedi, gete 'ida 'Inapwana 'ina 'ebe gwausowala. ^{21b}Ta 'omi enaenatunimi, geya'abo natumiyao wagiegie gamwasowalidi 'abona nai 'adi 'oata'oata wasa'usa'u.

²²'Omi toguinuwa wate 'imi 'inapwanao bale'uya 'enadi wada ematamatedi yage yauyauidi manudi. Ta geya'abo 'abo tuta nina silomata'i'isimi namo 'enaya wada paisewa ma imi gwaunuwa, be 'enega 'aene wada giegwausowalidi, ta esi tuta maibo'ana 'ediya ma imi 'atetagwala, Yaubada 'ana 'amayabega. ²³Ta 'imi guinuwa maibo'adi 'ediya wada gwaunuwa, nigeya 'aene tomota manudi, ta esi Yaubada manuna, ²⁴be muliyega 'Inapwana nina 'enega 'ami pali wa'ewa, manuna 'ida 'Inapwana Keliso manuna taguiguinuwa. ^{25c}Ta esi toto'umali nidi 'ida emaisidi yage to'umalidi 'ediyega. Manuna nigeya 'ebweu wate mali laina 'imiyami.

4 ¹Ta 'omi 'inapwanao, wada laina palupalu 'imi toguinuwa 'ebweuna 'ebweuna 'ediya, manuna wanuwa'i'isi 'aene 'omi wate 'imi 'Inapwana 'imiyami galewaya.

Loguguya sidasida manuna

^{2d}Wa'ita'i'isimi be geya'abo 'imi sidasidao sineeneta, ta esi wada lokagutoki Yaubada 'ena, be wada e'alama'i'ita 'imi sidasidao 'ediya. ^{3e}'Abo'ama wate manuma wada sidasida, be 'enega Yaubada 'eda 'ida gieapwese 'emaya, be 'enega Keliso tetelina kwaikwaiyina 'ada simasimana apwese tomota 'ediya, tauna tetela nina gete 'ana simana manuna sisa'u luguyegu deliya. ^{4f}Enega wada sidasida manugu, be tetela nina 'ana mwalatoi yada gieapwese be 'ida maedana, 'igu paisewa 'ana lobwene nadigega. ^{5g}Wate taudi nigeya Keliso 'ana toemisao 'ediya wada guinuwa palupalu, be geya'abo 'imi tuta wamudamudali.

^x 3:17 Ep 5:20 ^y 3:18 1 Pi 3:1-2 ^z 3:19 1 Pi 3:7 ^a 3:20 Ep 6:1-3 ^b 3:21 Ep 6:4

^c 3:25 Gu 10:34 ^d 4:2 Ep 6:18 ^e 4:3 Ep 6:19 ^f 4:4 Ep 6:20 ^g 4:5 1 Te 4:11-12

^{6h}Nuwa'ole'oleyega tuta yauna wada onaona ma imi mwalatoi 'ai'aila, be 'enega 'abo gosemiyao sенаidemi wada e'ie'isadi ona palupaluna 'ediyeга.

Lokaiyoni

⁷ⁱTikiko ma'etamo 'iwawai be 'igu guinuwa maibo'ana 'ida simanedi 'emiya, tauna gosедai bobo'ana, ta 'Inapwana 'ina toguinuwa palupaluna, ta ma'emai 'aguiguinuwa leleleya. ^{8j}Ni'atu yaetunenawa 'emiya be 'abo'ama 'ima miya 'ida simane 'emiya, be wate 'ina loguguyega 'ida giepa'alimi.

^{9k}Ta tasidai Onesimo Tikiko ma'iyana siweewai, ta Onesimo nina tauna 'ebweu 'imi sena taina, ta tai bobo'ana ta ma 'ana emisa, be taudi to'ase bada siapweapwesa sida emwasali 'emiya.

^{10l}Alisitako ma'iyagu deliya 'amiyami, be 'ina lokagutoki 'emiya gete yasimasimanenawa, ta wate Maki, tauna Banaba nibana (Lowa yaemataluwemi Maki nina manuna, 'aene 'eguma 'iwawai wada bwaue 'imi anuwaya), ¹¹be wate Yesu, tauna 'ana esana 'eluwenа Yusito, 'idi lokagutoki 'emiya. Taudi sitetoi me Yudia nidi bada ma'egwao 'apaipaisewa Yaubada 'ina 'ebeloina manuna, ta taudi 'igu miyamwau 'ediyeга sigiegie waiwaiyegu.

¹²Epapila wate 'ina lokagutoki 'emiya, tauna 'ebweu 'imi boda 'emiyeга, ta 'iguiguinuwa To'etoseyana Yesu manuna, ta wate 'ina sidasidao 'ediya 'isidasida waiwai be 'aene wada toolopa'ala ma imi bubuna maibo'ana bobo'ana, nadigega Yaubada nuwanuwana. ¹³Ona'ai'aila, Epapila nina ni'atu 'ietaetapewa 'omi manumi, ta wate taudi me Laodisia be me Ayelapolo manudi. ^{14m}Wate gosедai Luke, tauna togile'oasa nina, be Dimasa, 'idi lokagutoki 'emiya. ¹⁵Gosedao sena Laodisia 'ena simiyami 'igu lokagutoki wada simane 'ediya, be wate toekalesiyao nidi waine Nimipa 'ina anuwaya sitapwatapwalolo 'ediya.

¹⁶Imi leta gete 'omi toekalesiyao wasawa nugane, be muliyega waetune toekalesiyao sena Laodisia 'ena 'ediya, be me Laodisia 'idi leta wate sida etunenawa 'emiya be wasawai.

¹⁷Ta Alikipo waeona, 'aene, "Guinuwa nina 'Inapwana 'i'ebwa'emuya, 'uda etapewa 'ena be 'ulosaloni."

¹⁸Lokagutoki gete taugu nimaguyega ya'etoladina. Wada nuwa'i'isigu 'aene deliya yamiyami.

Oboboma 'emiya.

'Abo'agu Paulo.

^h 4:6 Ep 4:29; 1 Pi 3:15-16 ⁱ 4:7 Ep 6:21 ^j 4:8 Ep 6:22 ^k 4:9 Pilim 1:10

^l 4:10-11 Gu 27:2, 12:12 ^m 4:14 2 Ti 4:9-12